

白
華
前
稿

白華前稿卷第二十三

南滙 吳省欽 沖之

墓志銘 墓版文 誄 祭文

封奉直大夫徐君墓志銘

予與徐武選長發以乙丑歲籍諸生而予先武選官京師且十年武選歷待詔司務遷有日矣歲辛卯成進士遂分部額外需三年予與其封君輒貽誠毋遽歸雖邑人官京師者皆用是爲言武選貽望曰吾父少而孤無兄弟至二十八喪吾母吾年四歲耳吾父不再娶不蓄媵侍鞠吾教吾以有今吾又無兄弟今 慶典當得

封吾父吾朝捧誥而夕投牒耳而誥軸需臬下比下而君已捐館武選遽奔歸歸卽亟以葬乞予文銘其幽予觀昌黎韓子以歐陽詹捨朝夕之養以來京師雖未得位以歿詹與父母可無憾嚮使詹得位爲父母榮雖父母歿其無憾較易明也君食貧守約不得志於有司典衣易書數學不勸所爲詩效柴桑翁香山居士而沖退亦與相似嘗一日食不再夜分冒雨翦園韭烹之怡然得飽卽一介不妄受君固無慕於世而爲之于者必待是以慰其心至不能遑緩數十日以逮其存此亦無如何焉耳矣君諱士煌字丙南以字行又字古愚自宋

南渡諱範一者居上洋鎮世爲上海人以子貴封奉
直大夫兵部武選司額外主事加一級考諱隆吉贈官
與君同妣金氏配黃氏俱贈宜人子一卽長發孫五鍾
杰國子監生鍾英鍾雋鍾懋鍾純君所圖老屋課孫者
也君以康熙四十年九月十七日生乾隆三十七年五
月十八日卒某年月日與黃宜人合葬於縣之某鄉銘
曰

武選渡江三版破流聞舊里舉疑詫君曰無害笑相謝
武選再偕計吏行君曰行矣朝籍榮需五年後進士登
君言而中善學易厥疾遽殆嚮無疾奚不趣子歸侍側

死生有命誰預知知而不言容有之維令名貽令德貽

候選府同知成君墓志銘

通州成教諭文燦以婦翁保君兆炳爲子同年進士持書來請曰燦七歲而孤諸弟僅襁褓賴吾母丁宜人教得稍自立吾母相吾父久素善病家政苦凌雜旦起至丙夜始得休憶燦補學官弟子員及以婦廟見僅見吾母笑顏今吾母見背又五載惟所以述吾父之行謹識焉不敢忘幸以文志其墓按君諱祖蔭字宜振先世自江右遷通之海門鄉曾祖一行兩舉副榜貢生以書名祖宏蔚邑庠生三舉鄉飲大賓父志山東淄川縣知縣

治行舉第一母梁宜人早卒生母孫宜人娶丁宜人扶
風縣知縣腹松女子四文燦其長也文焯文煥文炯俱
國子生女二壻某國子生孫某辛卯舉人葬以某年月
日卒以某年月日生以某年月日丁宜人先君若干年
生後君若干年卒耐葬某阡君就傅卽解四聲顧不喜
舉子業卽專治詩古文下筆有家法淄川公以校官滿
秩遷莅治時年已踰七十巡撫海寧陳文簡公以爲賢
雖他郡縣疑獄舉埤益之又善病觸暑病益殆乞歸公
固不許曰若子才足倚也方淄川公歿於新城攝篆時
所徵賦大半代者許君未至亟拆封羨入可數千金君

泣曰焉有父死而因以爲利者俗忌歸櫬不入門君與
丁宜人挾櫬奠正寢旣授秩府同知以母老不出視族
人有恩誼卽朋友告緩急無不應四方遊士聞君名輒
至至輒埽室待圖書茗枕相聚如古懽蓋君家自淄川
公以仕毀丁宜人佐操作親織紵雖見義必爲家傾日
益起州學啓聖祠久廢君獨輸數百金新之乙亥歲大
祲出千斛米力疾爲之倡疾革猶以州人乏食爲語州
之中焚香祠禱願減已算益君者以千計其卒也巷哭
不絕予觀富之人其性嗇其用侈聲色土木之娛一旦
糜多金不惜至爲子弟延一師恒斤斤靳之沉誼之所

不屈責之所可譏而惻然動心至死不忘哉此九中銘
法也銘曰
匪力之餘翳德之餘學之優不以溫卷仕之優不以
褻裾以堂以斧以慶於爾家

文林郎湖北恩施縣知縣韓君墓志銘

君姓韓氏諱悅曾字以安別字翼雲長洲人曾祖勣廩
生贈禮部尚書祖葵禮部尚書諡文懿廣西崇善縣知
縣孝餘其考也翰林院庶吉士孝基其本生考也妣孔
孺人周孺人本生妣范恭人生妣顧恭人韓自文懿公
舉會狀元文章顯天下君同父兄司經局洗馬彥曾內

閣中書慶曾順應府知府萊曾皆髫髻科第君三放省
闈吉士命多作小題文會出後崇善三遭大故乃以例
授縣丞揀發湖北嘗署沔陽之巡檢人謂君不以屑意
而勤於供職安之若素丞蒲圻量調天門所治臨漢水
司隄工前丞以隄塌罷君度迴瀾漫沙冲灘之利害戶
置夫圩置長課民種楊柳廣積土石以備衝決之患旱
則停水漲則放流凡數年邑不滄漚權枝江安陸雲夢
應城天門潛江竹山蒲圻長樂黃岡京山隨荊門諸州
縣事擢知恩施縣縣有邱某戕於姪其家以疑夙讐讐
亦自誣服而邱之姪已颺君廉得之於蜀境獄始定枝

江盜有彭七者前令以無辜三人具讞君原之而七亦尋獲京山號難治君受狀卽勘凡越訴誣控及唆健者數月後自相解散其令蒲圻爲文告城隍神除虎警歲旱升龍尾山汲泉烈日中不少汗暍雨澤遂降嘗曰遇事弗求捷獲折獄弗求取媚又曰訥爲福與矜爲譴樞平生寡言笑慎交納服御皆故敝篤孝友之誼於非道非義泊如也去年秋予試施南施南之行按自予始其請設棚自君始君已抱足疾不得見時咽兒自蜀紛竄鎮臣率兵數百餘營利川司道踵至君力疾經犛遂至不起惟承烈視含殮餘皆留江夏君以康熙六十年七

月二十三日生乾隆四十六年十一月初九日卒配樊
孺人山西平陽府知府駿天女子男二承灝承烈俱太
學生女三適范徵謙蔣銘雲蔣寶仁孫二銘曰
孝不衰於親義不毀於人政不虐於民以庇其後昆壬
寅臘朔乃祖古長洲世安土視吾文章治譜

查太宜人墓志銘

予同年編修視君德麟年二十而入翰林踰年以母來
養京師又九年而君奔父喪仍留家京師又三年君視
學陝西時予視蜀學得代返觀道西安聞君去官奔母
喪且旬日子至京以狀來曰吾母爲編修嗣韓查公之

女孫年二十三而歸吾封翰林院編修贈提督陝西學政臥巖府君六十一而封安人六十七而封太宜人以是年十一月二十四日卒蓋乾隆四十三年歲丁酉也吾母所卜之兆距府君兆可一丈雖耐墓猶之分葬也歸匱有期請以幽宮之交納之永久嗚呼柳子厚誌其太夫人盧叔妣陸歐陽公自表其阼以君之宜自誌而願請於予予何敢諉也祝故海寧望姓臥巖公諱懋英十四歲而孤棄舉業以名家言遊燕齊淮蔡間性伉直所遇輒左太宜人時舉伯宗之妻之言爲誠事姑氏沈與妣氏願處無間言沈太君患風痺且草爲籲以身代

病卒起遇饑歲與婢紡木綿佐饌具紡車聲至雞三號
不輟一夕有老人幅巾深衣扶杖捉麈向太宜人膜拜
婢驚呼太宜人見若領首曳杖而去而太宜人生四五
歲時疫癘嚙出見太宜人至卽去人至今稱異焉其教
子甚嚴君入塾初嘗以公燕袖時果歸奉則問曰有長
者見否曰無曰此故懷橘事然長者見則可否則近於
掩取漸不可長也曹湖宰木甚夥其神者舉族分買之
以飲祭費獨不及太宜人詢之司事者司事者曰汝家
貧惡負所償故不汝及也太宜人不與較惟督教日嚴
君既貴凡交遊酬對有小失必令悔改乃已讀書通大

義獨不喜爲詩曰此非婦人女子所宜爲遇下有恩禮
其去家入都也以姑氏春秋高不能遠涉乃爲贈公置
筵室以侍養云生子一卽德麟女一孫二孫女一嗚呼
士大夫仍世清白幸得盡一日之養至於皇華載塗視
舍不逮較之生無以養死無以葬者抱憾有間焉乃恩
勤拮据養而兼之以教觀其後者幾不知夫子之有遠
行是亦人倫之誼軌而四牡騤騤不遑將母之詩將爲
君廢讀也系之銘曰

夫也天只斷機於房母也天只斷機於堂以貸姑算香
火告之以襄父葬鍼黹最之眠牛之區盤蛇之港合之

離之以耐巍壘

先考耕巖府君先妣顧太淑人墓版文

嗚呼先考耕巖府君歿七年而孤省欽通籍爲中書又
二年先妣歿於京又二年合葬南二龍港其明年省蘭
舉鄉試又明年省欽入翰林使轍頻仍邱壘失展當戊
戌春省欽自蜀返觀

上垂問曰爾弟能文爾文當不惡已亥秋使浙事歲乞
假省墓返覲時溫問如昔詞臣榮寵糜頂莫宣惟孤
等席累世之學諡受罔極之教養思乞當代立言之君
子以傳不朽而阡道褊迫缺焉有待滋懼日久事湮謄

振紀厓槩遺妻帑歸而版諸墓曰我吳之先自休寧遷
丹徒順江洲至元吉府君諱自昌避地家上海之下沙
鎮今割隸南匯縣是先考之曾祖也康熙庚午副榜候
選教諭贈通議大夫日講起居注官翰林院侍講學士
諱燧字蕃宜太學生贈文林郎河南密縣知縣諱宗亨
字嘉會者先考之祖本生祖也考廩膳生贈通議大夫
日講起居注官翰林院侍講學士諱啓秀字迂疇妣趙
太淑人生世父郡增生成棟及先考而卒繼妣倪太淑
人撫先考纔六歲耳其後乃生季父戊辰進士今廣東
樂昌縣知縣世賢先考幼而俊爽嘗冬日就邸塾墜水

及水底閉目以手左右撩得一葦未刈者緣而上倪太淑人蒙被汗之竟無恙少長先大父親課之時周浦王先生鑄以文鳴三郡間見輒擊賞鄉先生若顧侍講成天周刑部吉士咸以謂芥拾科第小試累高等而屢擯鄉試益務根柢之學夜肄經史晝課生徒於詩法陶於詞法蘇辛於書法李北海冀得一當以遂祿養故所以望省欽尤至憶七歲入塾初塾師課省欽讀孝經能隨口誦而實未識一字先考因錄周禮使誦之先大父錄易書禮三傳先考遴錄國語三史韓歐曾之文督使習誦事親以誠交友以直館閔氏十年最後主人伏地固

請而泣不能起貴介子延課其子而目泫於博簏聲
伎之習先考正容規之卒辭去少館某氏婢有挑之者
卽薄暮自闔戶以爲常銘座右曰下交不難有威而難
有惠平交不難有情而難有義上交不難有禮而難有
體無澳忍無枝害視義利之界如淄澠黑白之審且決
挈省欽於館自十歲至十七歲凡八年挈省蘭自九歲
至十二歲凡四年遇字畫偏旁小誤或溫習經古交口
稍踰輒手笞數十長跼移時乃釋嘗課季父文不當意
笞至流血嗚呼省欽驚下無似以奏賦授官自朝考大
考至試差累第一省蘭官助教時撰平定金川土司箴

爲

天子激賞命一體殿試凡應奉文字稱於時自非仍世
績學與青霞之奇氣鬱久未抒豈易以及於後而中壽
不延青衿殫絃此省欽兄弟所爲仰天椎心而慚卿慚
長尤慘然愬然不能一日忘者也先考諱成九字和仲
一字耕巖邑增生康熙甲申九月十日乾隆辛未三
月二十九日歿先妣顧淑人邑庠生贈奉直大夫翰林
院庶吉士鴻烈公長女乾隆己卯三月十八日歿生康
熙癸未八月廿九日自歸我先考後棗榛之誓羹湯之
調浣濯縫紉之役靡不親執省欽兄弟衣履自象勺以

前無假他手成者雖脩脯不給用無幾微怨尤色升斗
所卹每出自績紡之餘省欵奉至京師不一年日以少
事爲苦其歿也以喀血先考之歿也以利其非惇也以
乾隆辛巳九月三日子省欵癸未進士今提督湖北學
政日講起居注官翰林院侍讀學士省蘭戊戌進士今
翰林院編修文淵閣校理女一適丁酉舉人唐祖樾祖
樾爲亡姑子所居近先墓晉柳子厚謂先墓無主晝夜
哀號懼毀傷松柏芻薪不禁以成大戾此之有恃無恐
抑先人厚德之所致已惟是歐陽公表崇公而復爲母
鄭夫人石槨銘宋潛溪表母陳夫人墓而復爲考蔡峯

處士阡表誠以天子之揚其親繁而不殺特墓表之義
表其人之大略可以傳世者子厚有故叔父殿中侍御
史府君墓版王止仲曰名曰墓版其實表也然表必以
石版則以木爰爲文版之墓門循俗例屬門下土左春
坊左庶子文淵閣校理山陰平恕填諱而石表則俟之
他日壬寅十月日孤省欽謹藁

錢漢林誄

有序

去年秋予佐試浙闈諸暨錢鴻漢林治春秋與雋蓋幾
以第三場僂失矣今春會試僉以試文示予予以生爲
最榜發被黜四月十七日詣予告歸曰驢已券矣閱旬

日忽使人求醫醫未至而氣絕其同年生以予之哀其
不遇也請識其遺牋嗚呼生之死予殆速之已矣生不
傳必不入都傳矣入都矣而不賞其不第之交必不潦
倒淹鬱以至於盡然生之別予欲然若藝之未至而毋
有不平且曰諸暨四十年不得一進士卽祖若父又弗
耀以終幸兩弟俱入庠序願砥礪共學冀稍有成立生
豈自謂死且客死若此之速此予之所以厚哀而不能
已於言而又不能詳爲言之也生敦樸凝重於相無遽
死法然以生春試之文不第而甚且不一薦則其死固
也生試諸生累第一其文素非無知者子二俱幼於其

歸輔時爲誄以哀之曰

何其偉兮七尺誕不汗兮七日失三試兮禮闈杳百程
兮水驛羌羈魂兮盍歸予式穀兮弟孔懷嗟上計兮死
促之疇掩袂兮予祝之

祭同年高孝功英文

嗚呼謂蒼蒼者於君歟耶奚以試舍人舉甲科而應羣
宿之列也諺有云亦既抱子不爲夭折也謂蒼蒼者於
君祐且吉耶奚長沙賦鵬之年而僅羸其一也矧首邱
之弗正而舍館以奄沒也有二親與羣季而弗獲執手
訣也君之卜居也屢矣以婦病亟遷遷而婦病未脫也

奚試以身而禍愈烈也君之邸承其師侍讀邵公邵歸而君遷以入也奚邵訃而君旋卒也君病一年有餘厯然者柴骨矣吾儕屢及門而君屢辭豈自知膏肓之弗除而弗忍灑淚別也抑以後會孔長而疾尚可活也君年壯而氣盛其初似無死理顧藥弗能弗雜也藥固死弗藥亦死尚無憾乎砭熨也顧藥裹頸仍而餐錢月俸之先微也豈無隻輪單騎他人是售而外此奚長物也同年得京僚者不五十人其假去憂去者凡數人而牟吉士陳助教相繼卒於官奚至君而閱三劫也迦花江廣宴之時而曾不以一瞥也陳之帑寄於其姻牟覩返

黔殊遠若君籍西浙也庸詎知淒其酸楚者之無以別也
以君之溫醇易直其儀貌有壽者相而溘焉天奪也
夫亦末由究詰也君夫婦淹疾長女纔十一齡爲嘗藥
料理家政匪直至性不可及也奚六歲之孤兒而搶呼
者成人之禮是執也君之訃三十日當抵家家人當有
來視遲凍解而櫬始發也豈死猶戀此而怛化於冬之
日也嗟餘不之清漪而奚時以紼也昔昌黎之銘元賓
一言一話臨風增感曾同年而稍有悲也君奚時荆塋
而銘君碣也奠絮酒而述哀有竚乎靈之來悅惚也

祭同年徐戶部

天驥文

昔宴曲江昭陽協洽四十餘人京僚上簡君與高葵戴
璐著版者雲如同隊魚鰓影啁啾騎則互聯茵則互接
各仕曹郎如濟得檝戴以憂歸畱家京邑高也沈緇昨
冬奄溢賴君經紀鉅細妥貼附身附棺誠信周浹匄
之救霑涕被頰丹旒搖搖計可下牕一死一生交情帖
帖上巳元辰應官抱牒謂君幹敏可督錢法詰朝病侵
回惶縮澁遂不署名息關意慙藥裏左攜經卷右執與
客晤談尚戴巾氈天道如弓人生似葉纔閱兩宵巫覡
喋喋舉復於屋婦擗於闔時無童烏遺書孰輯藉有詰
兄東華適踣右巔左齷飯貝是納前和後和坑繫是合

以次立後觀禮攸攝且待秋風乘凌聖娶升峯婉孌餘
緒滄溟揭以螭首封以馬鬣夫復何言淚痕空泚溯君
承家人人有集不惟簪纓照耀雜遝嚮學蚤年典墳漁
獵鹿鳴升歌鳳池練習策名粉闥進自黃閤支倉支金
銖兩升合不瀟不苛鉤稽汲汲舉能其官竚列薦劄君
哲而癯壽骨較乏其精悍氣卻露眉睫炙輶之雄聞者
口嚕浮白之政見者膽驚五載以來游處目狎何竟忽
焉剎那告劫官止曹司年止三十三日不汙大命遽及
天耶人耶靈不我答地下若逢高也雨泣歆我桂尊酸
風蕭颯

祭餘姚諸太師母蘇太恭人文

嗚呼恩門岩巖一官鵠退爲祿養謀出山或再茲春析
津迎 鑾結隊奏賦幸 恩間邀起廢當來不來

壹何遲回俄捧素書使我心痾云背北堂月辜日晦將
信將疑得毋茫昧憶昨臘徂風雪靈靈有來自姚母故
健在暇輒拈鉢餐宜茹菜牽衣者孫兒桃以醕蒙袂者
鄰爲粥以賚裝棉以施臨視大耐八十雖開眠食勿廢
板輿逍遙艱步奚礙否則椿庭寧弗顧內而於杪秋入
閩慷慨驚魂旋甦聚哭數輩母猶大母粗悉厓槩禮樂
門楣蘇湖官窠經師於抗不瑕不類兩齋翼如士心藹

藹再三相攸作都講配味絮成章采蘭結佩胄本清華
職先濯漑堂有羹厨室無粉碓巢鳳痕空橋烏聘貸商
略同心子衿何愛送外遠行征衫手裁寒衲船舣巾箱
驢背行地河渠極天關塞明農弼刑破除襍穢大府勤
求後車敬載間歲一歸懽焉左對微母也才旨蓄誰父
微母也賢式穀誰誨奮起攸同嗣興惟代師於其間望
協鼎鼐階藥芬敷臚雲輿鍵八座起居延休未艾乞郡
匪榮爲親罔悔彩戲盼披膳珍晡夢爲仕而貧滑稽所
慨曾不再暮山田蕪歲實命不猶疇申尺喙聞昔之年
寢門火逮凝然泰然神理淵沕鬱攸斂威食頃遂沫後

祿是徵偕老遽背盟風怒摧枉籲宗岱天竟難呵鬼眞
可刻所可怛斯刀環路闕所可慰斯諧花寵戴寶樹童
童再回天睽訢奉太公預營爽塏卜爲母藏峯縈
波滙姑俟爾時服勤春刈地杳天遙師在苦幽罷諷蓼
莪一尊殷酌

杜觀察繼配毛恭人祭文

夜軫摧絃春林啼血夫子忘私我儕抱怛鈴閣重鰥鏡
臺永訣齋莫斯營音微遽歇恭人篤生溯漢先誥亨棗
遞嬗韓魯竝絜赤堇族蕃紫纓眷絜內外分臺科名表
榻璞記方流珠涵圓折牕前唾絨庭前詠雪內則所書

中壘所列騰譽賢能宜歸俊傑織素縑同膠鸞鳳匹洗
手中廚投懷內室奉必親嘗視如已出銜卹而還種松
成樾授夢而占藝蘭備苗曰孝曰慈無差無拂恭人治
家使者覲闕西川持斧南路佩璫大軍孔興小醜不
率俾挽芻糧俾運矢鉞雅雨霑淋黎風飄忽敬俟歌饒
愷歸屏闕此及三年昨當七月萬里舟航廿程車茀淫
潁堆邊雖驚斷紉杜陵堂後微聞御瑟宿痼俄乘大藥
終竭碧波沈素娥輝缺總帳徒懸粉匳尚設穉子搶
呼官人悼別飯舍未視衾殮未挾病匪須臾恩從決絕
方數月前觀察司鐻公暇言旋情悰具結相莊若賓相

間何闊方半月前觀察還節豈暇晷骨空嗟出骨以職
相勉以義相揭匆匆事征耿耿填咽曾未移時慘焉降
割篋贖金鉅析虛繡襦絲管難陶輻輳待發上水之年
玉珩響戛下水之秋桂旗影瞥廢御棲舍興僿感切天
道寧論人生已悲維靈罔恫所望未缺并服煌煌花誥
秩秩雁雁聯行牙牙學舌傳語藁砧待殲蠛蠹毋悲炊
臼毋筮困莢言哀不傷陳義不曠畫雲含酸形管紀質
某等竝企相儀夙瞻門伐醫藥造傳臬復還達女木根
委嫺星彩沒慘緒偕紫德音孔括稊釀告馨蘭散致潔
靈其格思鑒茲誄述

白華前稿卷第二十四

南漚 吳省欽 沖之

古今體詩槐唐集一

柔兆攝提格

東園老屋衡斗縱四狀若丁字庭有槐二株大四
五圍交枝互璠巧勝人力衆葉旣脫架格宛然不
獨濃陰圍蓋始足詠憩也屋今以奉王詩疏廟中
路曰唐行吾庭倚吾樹因誌吾始

短歌行

有酒盈尊有客盈門縱我高門逝者平原解秋實雖嘉

言有春華還家雖樂言有天涯二解顏回拾塵周公納冊

讒言其興憊莫之極三解桂楫以遊子無良媒交交黃鳥

止於樊邱四解松耶柏耶女蘿是施行吟蘆中嗟我窮士

五解佐雍用嘗佐鬪用傷承筐鼓瑟以希令望六解

長門怨

玉階草色暗長門歌舞平陽別殿昏猶有千金酬賦手

背人彈淚說君恩

袁將軍墓

孫盧氛濟惡殉義鬱崔嵬絃管縈祠廟臺榭廢劫灰尙
傳死綏節先製挽歌哀滬瀆風濤洶迢迢白馬來

儲冰墓

不見祛疑客身名幻莫雲一區陶令宅三尺鮑家墳
疎風起楓林落照分脊令原上草何處綠紛紛

龍舟曲

薄海歸耕日驕王縱獵場晴波縈薛濺風會逼吳閭闌
門東下淞江曲綺翠輕華看不足梧宮遙夜豔先施鶴
渚清秋怨諸陸鱸膾將蓴夾岸香雉媒傍草連茸綠綠
柳青峯圖畫同護花幡影轉熏風青龍江咽三閭怨白
馬潮迎伍相忠三閭伍相虛塵夢朱樓吹徹梅花弄水
調吳歌學采蓮歲時楚記傳嬉糴 萬歲亭臺枕水南

邦人笑語走趨趨簫鼓競移青雀舫雲雷紛迸白龍潭
聯駢指臂十夫合拏攫之而九地探象罔天吳眩名狀
撲鴨翩躚闕新樣展閣重重壓浪圓虹橋宛宛排雲上
灘鴻成雙颺遠汀鴛鴦相對窺虛幌更指淩波水上軍
盡拋織女杼中文障而嬌攜桐蕊扇稱身穩試藕苗袞
雪腕當簾舉玉豔風鬟映座散蘭芬是處贈花如涓水
誰邊開鏡異巫雲盡唱銅鞮佔客路不收金彈少年羣
此時惟恐靈鳥逝此時誰灑靈修淚孔蓋霓旌縱陸離
椒漿桂酒真游戲還憐幼婦鬱金鞵去逐迎神碧玉街
座佛梅檀香是海社公琥珀酒如淮門丞手版爭行入

寵婦腰金逐隊排魚龍百戲陳郊甸不怒偃翻裝假面
供奉梨園白首多傳呼菊部黃金賤雕杆佇勻寶瑟操
鶯簧瀏亮明珠貫向晚燈船簇彩毬金蛇無數甌中流
平攜隋苑三分月擬借秦淮一段秋酒旗風緊雲旗暗
山市星稀海市收鸞笙鳳管團羅綺鬪臂小兒裙未已
春申浦畔餓蛟吟闌間城上棲鳥起處處蘆花淺水邊
家家執扇秋風裏東逝江流流不迴江陵刺史諷舟哀
一鱗片甲非容易幾輩中人破產來

春江花月夜

游女風吹帶春樓罷玉簫蘼花還替月夜夜弄江潮

飲馬長城窟

人馬長城隅我馬長城窟立馬重徘徊中有築城血陰
山秋雪繁鐵衣春晝寒斧冰飲我馬隱隱天骨酸暮發
交河流朝抵黑水頭營門荷鋒鏑幕府鳴笳篳鴻鵠翔
高林沙蟲歧道周男兒一墮地身名良悠悠悠悠望長
城長城偏雲起生當策馬歸死當策馬死

邨居雜詩

舍旁三數弓投步問沙磧治此將何爲不治殊可惜呼
童荷鍤行一墩土澤澤嘉卉雖已微殷勤視封植匪懼
不毛誅待增草堂色試花安可期吾亦食吾力所以於

陵賢灌園養孤特

嘉蔬悅衆口小摘朝露博豈不畏厭浥物情貴滋鮮盤
餐久買女敢希送園官早韭子方實晚菘甲尚拳天慈
本同荷生成惟所安所嗟種荆棘衆業難自全

入春浹雨澤非種榮欣欣一鋤易爲力嘉種知懷新雖
然及旱暵灌漑敢辭勤出入抱瓦甕因之舒頰筋非種
怨吾苛嘉種德吾仁於吾卒何與萬念合一真不然坐
隴上且問東西鄰

東家一穉子挾冊行我庭云從學書後已足記姓名同
舍三五輩洽比比弟兄進學候雞唱放學佐牛耕耨歎

類都雅揖讓如有情請觀禮教美可以措笞榜孝弟與
力田設科此由成

雲階塗玉露刀尺廩授衣求衣衣始得凡事圖先幾浙
東養蠶女蠶飢待葉歸浦東種花女花熟蠶絮飛亦知

帛勝布念彼織者飢寄聲裘馬子無數義在斯

吾鄉謂木棉曰

花猶洛陽謂牡丹爲花也放翁詩自注
吳人謂桑曰葉王逢吉有浦東女詩

野人來款扉問我爲園處而我故無園衆綠在鄰樹時
聞黃鳥音宛轉隔離度古來達觀人繕性一憎惡有園
失久要無園得小住長安盛貴游幾別故林去懷哉馬
少游澤車紹前步

撮蜂操

嗟蠶有毒瑕不予肉肉予尚可肉母則那言撮其衣我心孔夷顧瞻周道烏烏依依天平監之母乎忍之瀕九死其何怨冀父母之我知

強園單闕

婕妤怨

後庭雕輦路蒼涼忍見齊紈耀雪霜昨夜東風消息早
一雙新燕入昭陽

銅雀妓

賣履分香迹似烟東風總帳淚淒然君王疑塚連天起

何處登臺望墓田

夏考功彝仲故居

在郡西門外花園浜公死節處

花落烏啼遶廢邱當年壇坫擅風流
魚龍日月橫戈地燕雀君臣舞扇秋
死效懷沙天幕幕戰連驅市兒啾啾
國殤更有英兒在哀遍江南淚不收

陳黃門大樽墓

在廣富林

雲旗風馬舊黃門埋骨荒郊氣概尊
斜日凝陰盤鶴鶴寒江過雨長蘭蓀
義公黃犢何人贖庾信青騾也自奔
留取英聲冠餘子文章綺麗付誰論

七寶宿

迢迢孤舟夕莽莽華月暈竹外幾人家攜燈隔烟問

曉過小赤壁

移船就孤翠隱隱赤城曉何處趁墟人驚飛鶴聲杳

橫雲山

衡門余久棲一夢習嘉槌通隱興故超清游迹乍發拂
衣雲英英導策泉汨汨金葩秀陽崖玉樹蔽陰窟言升
化人臺庶晞左徒髮三江紛遶襟衆峯遠承戰蒼蒼浩
風烟炯炯隱城闕微聞嶺下樵遙辨水邊堡圖嶽雖未
成懷土茲不伐無由逢洞真二俊緬超忽

浮瓜鄰井

炎官火傘九霄猛渴龍怒吸石闌近江南暑溼何處逃
萬柄蒲葵搖不醒西家古井涼且蠲鹿盧流轉遑論錢
肯緣水厄缺供養暢好瓜戰堆芳鮮失勢一落一千尺
水與瓜皮同一色鑑處真令毛髮寒分來似把珊瑚劈
皇州瓜品榆次聞曾冰照座驅纖氛散車羸馬奉朝請
翻漿白汗迎斜暉較量樂事江鄉永農對圖書莫琴箏
獨遶銀牀看夏雲隔林嘶破元蟬影

五人墓

陰火成團畏晝行蒼碑三尺死猶生屠沽浩氣雲霄上
黨錮孤忠日月爭一代丹青堪涕淚四圍緹騎盡

卽勿心切

逢迎要離家。昨青山在。廁鬼何人。齒姓名。

元妙觀

下馬蕭蕭檜柏青。雲雷回惑闕眞形。太陰旂兒垂天語。
終古麾幢護岳靈。生動龍蛇馴廣牖。紛煩巫史竄荒庭。
碧桃未是元都種。多恐行人夢不寧。

惠山下田家

輕舟別半塘。百里漲蒼霧。亭亭秀山前。藤竹夾沙渡。
二泉新雨後。暗向水田吐。不見田中人。惟見水邊鷺。
連畦冠桑麻。遠波貼荷芋。嘉苗方擢青。崇蘭或挹素。
杳杳烟浮邨。陰陰樹繫路。平生沖隱期。于役已微悞。
暫此懷巖

耕悄然謝塵步浣沼遊未成竹鑪事非故買隱更何年
悠悠挂帆去

丹陽曲

郎馬去遲遲倡條跪地垂赤闌干外影腸斷孟珠兒
遠水碧粼粼無人理釣緡春潮如有信和淚寄西津
去船佛狸帳歸船毘陵驛竹樹夾官河蟬聲澹將夕
莫厭醉顏酡且問遊仙樂儂酤京口酒子跨朱方鶴

新豐

邨店臨高岸吳帆接楚檣波渾魚潦淺風緩稻陂涼玉
椀詩人酒金椎內史塘來晨眷吾黨擊汰薄樽桑

京口雜咏

一卷畫三分奸膽咄先破傳道狼如羊紫髯氣凌座

右狼石

季也殺白蛇其裔殺龍子至今蘆荻花橫埽半江水

右新洲

樓閣三霄上襟期一顧傳江山壯如此對酒莫悽然

右北顧樓

野草沒虛堂古楓落寒夜英雄乞子鷺亦是負籠者

右射堂

縱覽三山勝長留萬歲春垂楊復垂柳想見築樓人

右萬歲樓

黃鵠雙飛來東巡宴瑤席此日給孤園當時隱君宅

右招隱寺

我遊鶴林寺杜鵬竟何有思得頃刻花酌以逡巡酒

右鶴林寺

樹亦不必榮亭亦不必圯欲諧唐昌花迢迢望予美

右玉葉亭

金陵懷古

如虎巖城限北邙孫郎帳下最騰超赤烏吐火開吳會
青蓋蒙塵過洛橋何帝埋金浮夜氣幾人橫鐵斷江潮

父兄遺業君臣契一片降旗恨未消

帝座搖搖應列星永嘉南渡有神靈土龍蜿蜿雲浮岸
石馬蕭蕭夜竄銅絲竹未妨娛別墅河山豈忍對新亭
莫言揮塵非名士軍國蒼黃且勿聽

新洲霸業舊稱尊午夜無端救啟關直遣官家夷狗盜

盡

卽忍切憐原廟換龍孫投弓清晝機將洞露刃深宵酒

尙昏寄語彥回髯似戟石城嗚咽爲誰論

宮市華燈曉未收鳴雞荒隴迴生愁苑前法曲誇焦尾
殿上長啼笑禿鶩洛浦重逢蓮步細漢京一賦柏梁秋
無人解誦襄陽檄長使癡魂傍蔣侯

三十蕭郎典騎兵玉妃相見易關情龍顏日角符終驗
白馬青絲識竟成卽忍切有金錢投野寺斷無厓蜜到
臺城秦庭未見包胥勸詞客江關氣不平

奈何聲慘喚斜陽坐惜黃奴倚隱囊天塹依然漂木柿
風流畢竟絕銀牀綺春傑閣朝陳伎花樹新篇夜奉觴
他日總持成白首吳公臺下路蒼茫

錯落明珠照內家鴛鴦寺底路天斜碧收天水娟娟露
紫對風流楚楚花騎省人歸降卽就淩波單退漲江賒
當年姊妹承恩久暮雨羅衾重可嗟

匆匆璧組浩難憑孤負夷吾佐中興方鎮但雄唐史表

縣官且謾漢宮燈
烟花南部朱顏損
蠶繅東林碧血凝
惟有鍾山龍氣遶
萬年承
詔護喬陵

周莊

遠水連邨竹護籬
板橋來往白雲期
夕陽爲白明如綺
正是鱸魚上釣時

吳淞道中

木葉下沙灣
人家半掩關
孤帆來歇浦
雙屐記崑山
渡淺提魚過
秋清載鶴還
江波君勿剪
身在畫圖間

商歌

狹路相逢爾西我
東少年不知齒
莫達官不知路
窮北

風其涼雞鳴雨晦送遠思歸對酒思醉手無斧柯龜山
奈何

明妃

苑漏迢迢永巷哀玉階宣喚夢空回平生休恨毛延壽
已賺君王省識來

仙轡如琴輕絕塵琵琶絃訴漢宮春解圍笑獻平城計
從此和親悞美人

歲暮咏懷

林卧閱永久息心屏馳騫泊如甘食貧非博養高譽雖
乏租稅登時喜如親顧朝收復晚收懽然道情素中道

忽瞿然恐恐歲云暮
潛鱗無靜流神駒有前路
和歌蟋蟀篇良士審當務

朝見獵騎出莫見獵騎還
一雙射生手意氣凌飛翰
得失安可必馳逐從所安
儒有慎動作揖爾謂爾儼
但知從禽樂不知銜檄患
何如習絃誦屢空慕孔顏
萬事敦夙好悠悠長閉關

窮巷牛羊歸衮衮百憂繁
北風折枯樹斯粥謀式衍
旣令餒者充兼令凍者暖
君聽塞上鴻似恐稻粱罕
餽歲當概刪非徒任疎嬾
尺雪今何如同雲浩以滿
一笑撫條枚暗春報池館

莫歸知張丈奕蘭

泰源見訪

我出曙雲霏我歸津樹夕知有故人來雪深見行跡
著雍執徐

折楊柳歌辭

下馬拂垂楊上馬折垂柳行處若爲情春風滿郎手
郎行思曼舞不如楊柳枝郎行思曼歌不如楊柳辭

由白龍潭泛舟至細林山宿山家晨登二余山

歷陳眉公祠蘭筍亭騎龍崦諸勝

挈舟自方潭春影鑒明倩往來潮漸平向背峯屢變稍
揭兜羅綿預飽伊蒲饌巖磴軋鞅芒石淙溼琴薦蘼蕪

仙客竈栢道流院沈沈蛇跡遷寂寂虎心善塵鞅丁
我躬位業悵古先孤鶴誰與招蒼茫海雲斷

羣峯渺居人細林較紛錯廻巒揭松關修坂翳華薄孤
蹤踐遊麇幽響答語離濃氛墮市袂靜理人絃酌舍北
蒸陰霏垞南豁陽嶠山候本不常機心復焉託往碣六
朝移他山二俊忤超遙敦古懼吾欲結籬落

蕭晨戒清盥要我如有人永懷禽慶侶頗契貞白倫松
存失桂隱筍熟爭蘭芬卽境念顯晦觀物知僞真度崦
競捷足陟嶽忘疲筋悅心旣入奧遊目皆懷新萬象納
平野四美舒良辰振衣復晞髮歸詠全吾真

少年行

齒豁囊空未到憂
酒樓纔上又倡樓
自言悟得袁公術
願借人間去報仇

焦山漢柏圖

滿壁鐵立滄江汀
竹樹如髮埋幽局
枯木之堂侵曉坐
鼻息呼吸聞龍腥
大風吹山水倒立
倮僵拔地無春形
欲蘇不蘇死不死
斷枝瑣碎梳毛翎
飢鷹呼羣怒紛下
蒼爪寸裂銅皮青
幽幽尸氣飽霜霰
斑斑火色鞭雷霆
古心古貌絕時世
若石隱士耽沈冥
相傳此柏閱人代
漢官威儀身所經
柏寢早被老兒入
柏梁亦登將作庭

將毋拍有迫人義粉榆苜蓿長飄零歸然特出戰寒歲
陰陽精魄扶羣靈干霄直上照秦月弄影無下闕吳淪
配成鴻寶號三絕周宣鼎器華陽銘瓜牛主人抱遐尙
摩挲應許忘畦町孤舟我昨出山下奔流滄漭穿紫溟
平生節目嘆濩落獨采薜芷流芳馨孔明廟前頌正旨
大別山上傳儀型二者遊蹤吾未到想其骨幹都亭亭
唐松後起鶴林寺伯仲間共享大齡詩成孤歎上高閣
涇雲沾袂光泠泠

牖港舟夜

養養復寥寥扁舟酒乍銷竹深光漏火荻短響迎潮歲

月新華髮關河舊板橋何當買田隱微尚老漁樵

文姬入塞圖

歸漢裝如出漢裝貂襜褕映塞雲黃邊風吹斷笳聲緊
身是陳留女議郎

毳幙晨開別左賢牽衣行雁淚雙濺子卿故事無人記
贖取兒郎挂眼前

銅臺歌舞鎖春深洛浦驚鴻感賦心卻道老瞞非慕色
要從死友擲千金

管彤一一數班曹宛轉蛾眉曠劫遭未必勝他胡地鬼
半環塚草似青袍

贈墨工吳勝華

弱歲逮銜恤深樹號淒風引領天一涯無計歸殯宮水
逝不復西日昃不復東長跪啟阿母兒也書爲傭傭書
沒吾齒父骨歸焉從染血和一九灑淚舉一春嗟嗟子
墨卿血淚沈殷紅素旄一以返仰天猶拊膺母在有所
養父沒有所終誰能四十載色慕如黃童

鵲

庖人掌六禽厥品逮蒲鵲頗似鳩室盈亦近雛栖而怖
隨佛性安馴被童心狎招朋架閣高論種梳翎沓爲弛
綵線纏俾應金鈴答識途百里遙入賦五色合濡味甘

一瓢果腹守半合功爭繫帛雁技學鬪闌鴨率場俄紛
紛入籠蚤恰恰嚙從砧上飛卵付屋頭壓逐利智較昏
在醜從易脅臆對誠無稽請書爲三筴

采菱曲

湖中采菱來湖上賣菱去一字小扶闌是歡見儂處
郎住橫塘曲菱絲好寄將纖柔舉尺許不繫紫鴛鴦
照影菱華淡牽情菱葉多早知菱刺手悔逐畫橈過
涼交七月新夢遶五湖樂安得雙車輪如菱生四角

次青邨感王高士珩右

小市二三里平潮一兩信擁絮遊子吟停橈榜人飯巖

居避高軒汝社委華薜官官古遺民目斷寒雅陣

金闕夜發

烟客浩歸興月高聞鷓聲紅橋三百九遙下闌間城錦
瑟佳人語魚腸烈士名青楓江岸冷愁數夜鐘聲

龍華

柿葉輕紅柏葉斑谿橋深處釣人還吳孃唱斷瀟瀟雨
已過龍華十八灣

百曲弔陳挈壺仲台

仲台上海百曲人今隸吾
邑事明福王數上書言事

死節於雨花臺僕宋
千殄其尸亦自經死

十輝親眦小朝廷大角紛紛纏殺氣腥江上一鞭麾突騎

禁中幾盞勸長星元臣事去梅花觀前輩名留木末亭
及記封章移曲突景陽鐘斷苦誰聽

六朝金粉付殘叢四鎮千戈祇化蟲亂世未應沾一命
亡奴亦解報孤忠白頭結宅嗟江令長爪連塋見卞公
今日滬城蒙塋地濤聲猶咽大江東

陳枚倣本秦淮盒子會圖

六朝鶯草春作窩春燈烘暖秦淮波玉人殢波怯春影
隔院名姬走相請地衣堆皺簾額輕弓弓點屐無屐聲
彩勝銀幡迴四照東家失色西家笑比將瑤草鬪輸贏
狂殺金貂衆年少小鬟致語問金堂鴛鴦象板音沸揚

萬錢供張箸不下十六樓前私暖房一引名夢一相在
一樓各擁一花去明星欲落烏夜啼複帳迷藏定何處
君不見邨南邨北桑柘陰女兒簇鵲腮掩深永嘉南渡
終亡國采遍菖蒲花信沈

秋谿詩思圖

晚從谿堂宿曉揖谿漁語參如山水音清吟出松塢停
杯數落花前谿夜來雨

洞庭采蓴圖

三板輕船六尺蓬浮家準擬洞庭東此行不爲名山計
要采龜蓴替韭菘

石室金庭翠作堆上湖搖去下湖回祇嫌掌底蠃螬滑
那得千絲滿把來

玉糝金齋略似渠鳴薑配豉美何如行歌卻笑張公子
祇記吳江巨口魚

太湖蓴采舊無聞壬戌秋傳好事殷卽便抽帆下圓渚

鮑羹菰飯蚤輸君

洞庭蓴鄒舜五陳眉公於天啟壬戌秋泛湖始采之陳縉有題